

30. janúar 2020

Meningarsalur Suðurlands á Selfossi

Sveitarfélagið Árborg hefur nú um langt skeið lýst vilja sínum til þess að glæsilegur en fokheldur menningar- og fyrirlestrarsalur í eigu sveitarfélagsins komist í notkun sem Menningarsalur Suðurlands. Fulltrúar sveitarfélagsins hafa á liðnu ári átt fundi með fjölda ráðherra, þingmönnum og starfsfólki mennta- og menningarmálaráðuneytisins, m.a. Karítas Gunnarsdóttur skrifstofustjóra, um framhald málsins. Í þessum hópi hefur verið mikill og góður hljómgrunnur fyrir því að nú muni ríkið ráðast í að ljúka verkinu með sveitarfélaginu. Von er á minnisblaði frá ráðuneytinu til ríkistjórnar á næstunni þannig að taka megi afstöðu til verkefnisins og nauðsynlegra fjárframlaga.

Menningarhús hafa verið byggð um allt land með aðkomu ríkisins en þó er ekkert slíkt á Suðurlandi, ef frá eru taldir Eldheimar í Vestmannaeyjum. Það er löngu tímabært að Árborg og ríkið taki saman höndum og hefji lokaframkvæmdir við salinn þannig að hann komist í notkun og fái þjónað hlutverki sínu sem menningarhús Suðurlands.

Umræða um menningarsal Suðurlands hefur verið áberandi undanfarin ár en því miður hefur salurinn, sem er uppsteyptur, staðið óhreyfður á fokheldisstigi frá upphafi eða í um 40 ár. Fullbúinn tekur salurinn 280 manns í sæti en sviðið er samkvæmt heimildum eitt stærsta svið landsins sem myndi bjóða upp á mikla möguleika fyrir tónleika, leiksýningar, ráðstefnur og fleiri viðburði.

Á sínum tíma stóð Selfoskaupstaður fyrir byggingu menningarsalar á Selfossi í tengslum við byggingu Hótel Selfoss. Verkið hófst árið 1972 og var húsið loks vígt árið 1986, án þess þó að menningarsalurinn væri nema fokheldur. Öll byggingin, og menningarsalurinn þar með, fór svo í hendur annarra eigenda sem hófu þar hótélrekstur. Eftir ýmsar vendingar keypti Sveitarfélagið Árborg menningarsalinn aftur fyrir nokkrum árum síðan, enn í fokheldu ástandi. Sveitarfélagið hefur því þegar kostað miklu til salarins.

Stofnuð voru hollvinasamtök fyrir þremur árum síðan og hafa samtökin haldið málefnum salarins á lofti við bæjarstjórn Árborgar. Núverandi eigendur Hótel Selfoss hafa lýst yfir áhuga á að taka að sér rekstur salarins, en í því felst mikið hagræði fyrir daglegan rekstur til framtíðar. Hótelið myndi að auki leggja til þá aðstöðu sem fyrir er í húsnæðinu líkt og klósett, fatahengi, anddyri og veitingaaðstöðu sem nýtast mun viðburðum í menningarsalnum. Vissulega kallar fullbúinn menningarsalur á nokkra uppfærslu anddyris og móttöku, sem ekki þyrfti annars að koma til, og þarf að huga að þeim kostnaði.

Vegna aðstöðuleysis hafa menningarstofnanir ríkisins, á borð við Þjóðleikhúsið og Sinfóníuhljómsveit Íslands, ekki getað sinnt hlutverki sínu á svæðinu og þurft að sneyða hjá Suðurlandi. Aðrir menningarviðburðir og framþróun menningar hefur einnig þurft að gjalda fyrir aðstöðuleysið. Tónlistar- og leiklistararfur á Suðurlandi er vissulega sterkur, en mun betur fá notið sín við tilkomu menningarsalar Suðurlands.

Verkfræðistofan Verkís vann frumkostnaðaráætlun varðandi uppbyggingu menningarsalarins árið 2016 og var hún uppfærð í júlí 2019. Nú er heildarkostnaður við að klára framkvæmdir í menningarsalnum áætlaður **472 milljónir króna**.

Sveitarfélagið Árborg telur raunhæft að um 60% af þeim framkvæmdakostnaði sem eftir komi sem framlag frá ríkinu, eða um **283 milljónir króna**. Þeir fjármunir gætu t.d. fallið til á 1-2 árum þannig að menningarsalurinn yrði fullbúin árið 2020 eða 2021. Sveitarfélagið Árborg leggur á móti 40% af eftirstandandi framkvæmdakostnað, 189 milljónir króna, ásamt salnum eins og hann er í dag en hann er metin á um 7-800 milljónir. Samtals leggur Árborg þannig fram sem nemur nærri **1 milljarði króna**.

Sveitarfélagið Árborg leggur áherslu á að ríkistjórn Íslands komi að uppbyggingu menningarsalarins með fullnægjandi fjárframlagi, á móti framlagi Árborgar, svo hægt sé að klára salinn í síðasta lagi árið 2021. Menningarsalurinn mun nýtast Sunnlendingum og Íslendingum öllum, enda enginn sambærilegur salur með álíka möguleika og jafn vel staðsettur á Suðurlandi.

Á fundum með þingmönnum og ráðherrum höfum við skynjað einlægan áhuga fyrir framgangi þessa verkefnis og því mælir bæjarráð Sveitarfélagsins Árborgar eindregið með því að samþykkt verði tillaga til þingsályktunar um menningarsal Suðurlands í þingmáli nr. 55.

Með kærri kveðju,



Gísli Halldór Halldórsson,
bæjarstjóri Sveitarfélagsins Árborgar